

SCHNITZELBANK

DIE SCHWARZE

Die Bänkergnome, Gängster, Wichte,
Tüe Fränkli, Dollar, Yen vernichte!
Üses Vermöge ligt Gott sei Dank
Sicher ufere Schnitzelbank!

Boni, Boni, Boni, Boni,
Boni, Boni, Boni, Boni,
Boni, Boni, Boni, Boni,
Mir zwe singe o nüm ohni!

Ds Bad im Westside macht ächt Spass:
S'isch ä einzigi Rutschbahn, total krass!
Und alles andre isch am Roschte:
Mein Liebeskind das wird no choschte!

Ar Fasnacht si mir öppe bsoffe
Und o scho im Zick-Zack gloffe;
Chunnt de d'Schmier gäbe mir ne d'Hand
U säge eifach „Hüp Holland!!!“

Im Bundeshus gits itz ä Wanze,
Der Brunner het äs Mik am Ranze!
Das Toni-Mik würd ja no fäge,
Hätt dä arm Siech öppis z'säge.

U vor em Bundeshus, weisch wie dumm,
Gheit d' Wiehnachtstanne eifach um!
Üs persönlech tuets bsunders leid,
Isch die nid uf e Murer gheit.

Der Ueli isch lieber ga Stärne gschoue,
U de hetts ne dert uf d'Schnure ghoue!
Ja me weiss, dass als Bundesrat ringer geit,
Wenn d' einisch uf ä Gring bisch gheit.

Drum gits itz die bescht Armee vor Wält!
Die choschtet zwar ä Hufe Gäld.
Doch der Bund tuet d' Milliarde garantiere
U d' Arme mit der UBS fusioniere!

JUHUI: das isch der Bundesrat Murer Jutz,
JUHUI: dä tönt zwar eher wie ne Chutz,
JUHUI: doch mir wüsse, das bedüetet meh
JUHUI: das isch z' Parteiprogramm vor SVP

Dä Vårs da hilft, dass me verschteit,
Warum d' Calmy-Rey gärn Schleier treit.
Das isch für d' Froue zwar ä Qual,
Doch mit dene Franse hesch ke Wahl!

Ä einzige Schueh am Busch a Gring,
Dä verschwindet grad, brav wie nes Ching?!
Üs würds mi hundert Schueh nid glinge,
Der Couchepin zum Rücktritt z'zwinge!.

Der Sämi isch mit em Nef ga ässe,
Der Räscht vo däm Vårs hei mir glatt vergässe...

Öb z' Bundeshus äs Fumoire sigi ?
Fragt mi ä Roucher mit sire Zigi.
Das isch ke Rouch, das' isch viel schlimmer:
S' isch die warmi Luft us em Bundesratszimmer.

Der Jimmy Hofer – yes we can - !
Seit zu sine siebe Fan:
Giele der Change wirts z'nächst Mal gä,
Bis denn gö mir ga z' Vieri näh!

Der Papscht heig d' Schwyz schins wölle bsueche,
Är sig nie acho, me tüeg n no sueche,
Zwüsche Rom und em Lötzbärg irgendwo;
Ja dä hett drum dä Schiss-Alpino gnoh!

Hett öpper vo öich der Tschäpp gseh?
Dä isch verschwunde, weh, weh, weh!
Mir si besorgt, si irritiert:
D' Stadt Bärn wird vom ne @ regiert!

Weisch Alex, mir hätte drum irgendwo,
Gärn mit dir es Cüpli gnoh.
U hätte de gseh, wie stolz du bisch,
Dass die ganzi Stadt ä Ischbahn isch!

Der Brunner Toni seit zu sim Schätzli:
Du bisch mis allerliebschte Spätzli!
Mir mache mit öich jedi Wett,
Dass dä vo Vögle ke Ahnig hett!